



МОНГОЛ УЛСЫН ИХ ХУРЛЫН ГИШҮҮНИЙ
АСУУЛГА

14201 Улаанбаатар хот, Сүхбаатар дүүрэг,
Их эзэн Чингис хааны нэрэмжит талбай 1,
Төрийн ордон, Утас: 26-70-16, Факс: 32-70-16
E-mail: stategreathural@parliament.mn
<http://www.parliament.mn>

2019.05.20 № 16

Асуулга тавих тухай

Улсын Их Хурлаас 2015 онд баталсан Өрийн удирдлагын тухай хуулийн 4 дүгээр зүйлийн 4.1.4 дэх заалтад “улсын нийт гадаад өр гэж Засгийн газар, орон нутаг, Монголбанк болон Монгол Улсад бүртгэлтэй аж ахуйн нэгжийн харьяат бус аливаа этгээдэд төлөх төлбөрийн үүрэг” гэж тодорхойлсон. Дээрх тодорхойлолтын хүрээнд Монголбанк нь дэлхийн улс орнуудын Төв банкны жишгээр Монгол Улсын нийт гадаад өрийн статистикийг ОУВС-гаас эмхтгэн гаргасан Гадаад секторын статистикийг боловсруулах аргачлал, Мэдээлэл тархаалтын ерөнхий системийн шаардлагын дагуу 2010 оноос эхлэн боловсруулж, олон нийтэд мэдээлж байгаа билээ.

Өрийн удирдлагын тухай хуулийн 9.1.14-т “Засгийн газрын өрийн үлдэгдлийг улирал тутам, дунд хугацааны өрийн үйлчилгээний төсөөллийг жил бүр тооцоолж гаргах”, 9.1.15-т “Улсын нийт гадаад өрийн үлдэгдлийг улирал тутам Монголбанктай хамтран гаргах” гэсэн заалтад үндэслэн гаргасан өрийн статистик үзүүлэлтүүдийг харвал:

Засгийн газрын нийт өр 2016 оны хоёр дугаар улиралд 16 их наяд 612 тэрбум төгрөг байсан бол 2018 оны дөрөв дүгээр улиралд 22 их наяд 361 тэрбум төгрөг болж, даруй 5 их наяд 749 тэрбум төгрөгөөр нэмэгджээ.

Монгол улсын нийт өр 2016 оны 6 дугаар сарын 30-ны өдөр 24 тэрбум 260 сая ам.доллар байсан бол 2018 оны 12 дугаар сарын 31-ний байдлаар 28 тэрбум 743 сая ам.долларт хүрч, 4 тэрбум 483 сая орчим ам.доллараар өсөөд байна.

Иймд Монгол Улсын Их Хурлын тухай хуулийн 7 дугаар зүйлийн 7.1.13, 33 дугаар зүйлийн 33.1.2 дахь заалтуудыг тус тус үндэслэн Монгол Улсын Ерөнхий сайд Танд дараах асуулгыг тавьж байна. Үүнд:

1. Эдийн засгийн өсөлт 2018 оны байдлаар 6.9 хувьд хүрсэн талаар Засгийн газраас байнга онцолж ярих боллоо. Өнөөдөр дэлхийн эдийн засаг сэргэж, гадаад зах зээлийн эрэлт нэмэгдэж, уул уурхайн бүтээгдэхүүний үнэ өсөж байгаа нь Монгол улсын эдийн засагт сэргэлт авчраад байгаа. Зэсийн баяжмал, төмрийн хүдэр, газрын тос, цайрын баяжмал, алт зэрэг голлох уул уурхайн экспортын голлох бүтээгдэхүүнүүд 2018 онд өссөн үзүүлэлттэй, цаашид ч нэмэгдэх төлөвтэй байна. Нөгөө талаар олон улсын санхүүгийн байгууллага, донор орнуудаас их хэмжээний валют манай эдийн засагт орж ирж байгаа. Гэтэл Монгол Улсын гадаад өр ямар учраас өсөөд байна вэ?

2. Монгол улсын Засгийн газрын өр 2016 оны 6 дугаар сараас хойш 5 их наяд 749 тэрбум төгрөг буюу ойролцоогоор хоёр "Чингис бонд"-ын хэмжээтэй өссөн байна. Энэ мөнгөөр хийсэн бүтээн байгуулалтын тайланг ирүүлнэ үү?

3. Монгол Улсын нэгдсэн төсөв зөвхөн сүүлийн гурван жилийн хугацаанд 7 орчим их наяд төгрөгийн алдагдалтай батлагдсан. Үүнийг өр тавьж шийдэж байгаа. Гэтэл Сангийн сайд Ч.Хүрэлбаатар "У.Хүрэлсүхийн Засгийн газар байгуулагдсанаас хойш өнөөдрийг хүртэлх хугацаанд 6,6 их наяд төгрөгийн өр төлж барагдуулсан" гэж олон нийтэд мэдээлж байна. Энэ хаанаас ямар эх үүсвэрээр, хэн гэдэг Ерөнхий сайд, хэн гэдэг Сангийн сайдын үеийн өр төлсөн талаар тодорхой тайлбар өгч, жагсаалт гаргаж ирүүлнэ үү?


4. ОУВС-ын Өргөтгөсөн санхүүжилтийн хөтөлбөрийн хүрээнд орж ирсэн зээл, тусламж болон 2016 оны 6 дугаар сараас хойш Монгол улсын Засгийн газрын бусад улс, санхүүгийн байгууллагуудаас авсан зээлийн хэмжээ, хүү, авсан огноогоор нь жагсаалтаар ирүүлнэ үү?

4. "Өрийг өрөөр дарах нь архиар шараа тайлахтай адил" гэсэн дүгнэлтийг өнгөрсөн парламентын үед УИХ-дахь МАН-ын бүлгээс томилогдож ажилласан ажлын хэсгээс гаргаж байв. Үндсэндээ манай улсын өрийн тааз хэтэрч, Дорж Дулмаад өрөө дарахын тулд Бурмаагаас зээлж төлөхийг шүүмжилсэн дүгнэлтийг МАН сөрөг хүчин байхдаа хийж байсан. Тэгвэл Сү.Батболдын Засгийн газрын үед авсан 580 сая ам.долларын "Евро" бондыг "Хуралдай" бондоор, "Чингис бонд"-ын эхний 500 сая ам.доллар болон УИХ-ын гишүүн Ж.Эрдэнэбатын Сангийн сайд байхдаа авсан "Дим сам" бондуудыг 2018 оны нэгдүгээр сард "Гэрэгэ" бонд гаргаж 800 сая ам.долларын өр зээл шинээр тавьсан нь "өрийг өрөөр сольж хугацаа сунгасан" уу эсвэл Сангийн сайдын хэлснээр өр төлөгдсөн үү?

Дээрх асуулгын хариуг Монгол Улсын Их Хурлын тухай хуулийн 33 дугаар зүйлийн 33.3 дахь хэсэгт заасан хугацаанд бичгээр ирүүлж, Улсын Их Хурлын чуулганы нэгдсэн хуралдаанаар хэлэлцүүлэхийг Танаас хүсье.

Хүндэтгэсэн,

УЛСЫН ИХ ХУРЛЫН
ГИШҮҮН



С. ЭРДЭНЭ

0000000076